

欽
定
全
唐
文

欽定全唐文卷一百五十五目錄

上官儀二

勸封禪表

爲朝臣賀涼州瑞石表

爲于侍中請赴山陵表

爲太僕卿劉基請致仕表

爲盧岐州請致仕表

爲殿中監趙元楷請致仕表

爲房州刺史請朝覲表

爲李秘書上祖集表

對求賢策

對用刑寬猛策

馬周

上太宗疏

陳時政疏

請勸賞疏

諫公主畫婚疏

請簡擇縣令疏

欽定全唐文卷一百五十五

上官儀二

勸封禪表

臣某等言臣聞乾元惟大播四序而無言坤儀蓋厚寧萬
象而復一至於號均三大體覆載以曲成聖表千齡順剛
柔以藏用是以可久可大永固皇王之緒貞觀貞明獨照
陶鈞之上故可登封泰嶽類帝以尊天降禪肅然禋宗以
厚地伏惟陛下膺圖紹籙儀天纂鏡受昭華而光寶位正
璣衡而握金符銷伏鼇而綴上蒼剪應龍而清下瀆於是

靈臺偃伯暢轂埋輪刑政肅清削秋荼之繁蕪雅頌先烈
激圓海之漪瀾就月幽覃則燭龍開景薰風遠暢則蟠木
增華沒羽浮金之章昭載筆於仙室韋韞卉衽之首襲長
纓於蘭錡九疇式序七德攸宣發神化之丹青敷禮義之
粉澤旣而睿德潛通至誠冥召禎圖載啟神物發揮雙舄
呈班馴擾於君園九芝獻彩燭耀於帝池太史標祥鏡流
千里卿雲表貺凝華五色江茅鄣黍歲時鱗萃東鰈西鷄
日月波屬鴻符巨慶疇可詳言誠迺岱郊佇遂云垆望蹕
臣某等誠惶誠恐死罪死罪永言遐載緬鏡前徽王迹之

所歲黜帝圖之所凝遠龍官結繩之后鳥紀垂衣之君治
定功成俱備升中之禮塵清海晏咸申謁歆之誠異世同
符千載一揆諒以增高益厚式酬靈睠陛下德光宙始文
煥震初蓆蘿而因萬物典襄而濟下元鎔範生靈張四維
於地絡締構函夏建八柱於神樞宏規絕跡功無與二駕
三五而遙集超八九而騰驤加以璇厯啟徵躔南至於朔
旦金鼓問罪削左袵於交河固可恭柴燎之展采穆靈壇
之禋敬焉得徇小節於沖挹忘至公之鴻典絕三神之歡
拒萬方之志雖復翹心天路未留三舍之感延佇帝閣逾

邈九霄之望伏惟陛下紆瑤池之渺轡屈姑射之凝神酌
令典於中樽遵時邁於羸里採公卿之嘉議覽搢紳之讜
辭逸記重甄頽章再紐詔兩師以先路命風伯以清塵六
飛案軌九族齊列榮光承懋非煙翼衡輯瑞而嘉肆觀瘞
玉而恭儲祉方使日觀增華仙閣改飾神光霄映若流照
於春陵雲色晝開似凝暉於豐谷表咸池於翠岳萬歲叶
其殷薦席藁結於紫壇八神歆其明祀籠千古之偉觀孕
七百之不業臣等命與時偕濯景昌運優游渠閣之內怡
悵南風之弦棲息蓬山之阿弋釣先皇之道至於朝猷國

紀頗踐奧隅陛下推而不居竊所未喻鬱云梁之典缺懷
庭之儀沮神主之欲漏貪天之議伏願杲其日出照其傾
陽之心油然而作雲降其離畢之澤庶使飛英騰茂祕玉檢
而遐傳手舞足蹈扈翠華於喬嶽

爲朝臣賀涼州瑞石表

臣元嘉等言臣聞太陽含宇天之命也德水呈文地之符
也是知光膺寶籙非幽贊無以享鴻名對越兩儀非神物
何以昌丕緒故有元龜負卦繇表軒功朱鳥銜書兆彰姬
籙非聖人之撫運孰能與於此乎伏惟皇帝陛下慶韞上

元與天皇而合德祥凝太始體耀魄以齊明作周錫允王
業本於冰翼生商降祉寶祚基於玉筐然後樞電効神皇
虹授彩彤雲澹景標映龍顏瑞火流光呈發鳥跡由是凝
圖作極握紀中天化洽九垓恩綿八表功成戢武散駢服
於桃園業定宏文覃正朔於昌海輯五玉而彰禮備陳萬
舞而表樂成至德至仁垂拱巖廊之上乃聖乃神遠算廟
堂之下憲文王而授立招天獎於夢齡象漢帝以登賢選
仁明於副貳國重曜而臨照家萬宇而永貞是以淹歲亢
陽離耀昇而元澤降春疇罕闕震方建而年稼登受冊之

辰隨輕輪而翊佳氣夏弦之月接飛蓋而吐芝英郡國陳
孝德之符煙浮霧集縣道奏明靈之眈電擊雷奔豈與夫
日至月書可同年而語矣伏見涼州都督李襲譽表奏昌
松瑞石合百一十字文曰高皇海出多子李久王八千年
太平天子李世民王千年太子李治書燕山人樂大國主
尚注諤獎文仁邁千古大王五王六王七王十王鳳尾才
子七佛八菩薩及上果佛田天子文武貞觀昌大聖延四
方上下萬治忠孝爲善其文不次者畧而不載勅遣禮部
郎中柳逞馳驛檢覆並同所奏皆素文玉潔若瓊樹之華

滋元質碧鮮擬翠微之遠色雖復霞燦冠岳暉鏤采於介
邱海鏡浮山昭列名於稽岳方茲秀麗曾何足云臣等厯
選皇猷稽河圖於東序詳觀帝籙披冊府於西崑媧燧以
前不可得而知矣羲農以降考載籍而言焉若乃馬遷堯
壇鳳銜虞冊麟遊吐字頗涉劉邦葉蠹爲文纔稱病已元
石降徵於典午赤伏錫命於炎精皆髣髴如神徵六見意
或傍通以取證或索隱以求端猶且動色當年光華曩志
矧茲天冊顯發靈瑞頌聖德之欽明通史筆之揚堯典述
國祚之悠永倍龜策之卜周年追美先朝衍軒邱之德姓

式昭儲后邁鈞臺之有光豈非天鑒孔明聖猶大者祥彌
著靈心至察德加厚者祚逾長是用越契超繩光前振古
績無與二慶溢登千臣等自省微生幸霑鴻造荷重光之
煦育觀三才之宅心雀躍無以表其誠鳧趨不足勝其喜
臣無任悅豫之至

爲于侍中請赴山陵表

臣某言伏以塗官方撤祖載有期躋厚地而靡容跼高穹
而標絕臣昔逢開運委質藩朝荏苒迄茲年將一紀位非
德漸榮以恩滋顧視涯分何階致此而今谷林啟隧宸衛

將移衽席遺簪纏哀罔極方願整素翽而攀慕奉劔舄而崩號送往以窮事居方永時希宸鑒曲遂荒襟伏紙失圖罔知攸措

爲太僕卿劉基請致仕表

臣某言臣輕生多幸早逢昌運締構之初得効駑蹇誠款雖竭功績靡伸沐浴恩光謬叨榮級厯居近要出納隆顯顧循庸非踰溢涯分思展塵露以酬洪造鏤骨銘肌無忘夙夜但犬馬之齒甲子已多風雨之疾惛眊日甚雖年非致仕而力不當官簿領沈迷端緒紕繆久尸厚祿覩懼在

躬內省愆尤外慙物議乞解見職退就衡門朽質餘生獲
從藥療冀蒙渥澤未歸泉壤難預朝請瞻望闕庭葵藿微
心方希臨照不任悃款之至伏願天慈特垂矜許輕塵聽
覽愈增震越

爲盧岐州請致仕表

臣某言竊以日月迅驅歎留侯之過隙桑榆易晏嗟趙孟
之惕陰是以杖國之儀曩籍之通訓夜行之誠先達之明
範臣三河素品一藝罕稱斂衽衡泌之間優游農仕之際
特以雲雷肇構龍德在田遂得混吹齊庭薄遊梁苑昧昔

賢之先覺慶生涯之嘉會屬大橫固祉獎澤荐臻同管蒯
之靡遺喻衽席而無改叨竊非據綿厯歲時智能之効寂
寥何紀伐檀以茲興刺濡翼由是致譏况乎時迫耄期識
用衰耗仲宣體弱遽與年並修齡疾甚亦隨衰及范綏在
飾深驚蒲柳之秋葆鬢承冠逾慙仁壽之鏡空貽謗毀坐
素官曹虛受之來履薄未均危懼知止之分餘生實所庶
幾披瀝丹愚諒非矯飾伏願大明委照曲遂今請退影閑
扉待終初服倘弊帷未掩岱宗少駐擊壤歌其自逸高枕
歡其有餘望瑤池之還駕候仙閭之歸躅臣筮仕聖朝位

非才授曾微涓滴少答鴻私敢請骸骨心顏覲忤微臣限
茲外任不獲拜奉闕庭犬馬之戀徘徊何已

爲殿中監趙元楷請致仕表

臣某言臣聞高年致政前徽之彛準仲秋授杖綿載之通
規正以制逮乎桑榆愒陰於鍾漏臣顧惟菲陋輪轅無所
瞻言賓實高謝等夷筮仕之初不期通顯千祿所望抑在
代耕初以生涯多幸屬奉昌數仁被草木德洎昆蛟獎飾
曲流豐恩俯洽言揚德舉內視缺然比彥參賢載離滋永
至於姬駿長驅奉元池之廣晏妣龍遙鶩陪樂野之宣遊

塵露罕稱榮異空甚捫躬覩忤罔厯心顏旣而二膳在辰
懸輿甫及光華云旦聖造方深蒲柳行秋朽材知止勝西
羌而側勇惟東都而自牧伏請褫帶彤門歸骸故里挹清
風於國讓追盛範於陽元効釣璜於渭濱類飛星於河渚
是知疲驂解馭辭金根而不歸衽席帷幄去青蒲而方遠
望軒屏而徘徊仰煙霄而鯁戀無任感愧之至

爲房州刺史請朝覲表

臣某言臣一介薄才不周時務命隨事偶超竊宦途厯職
文武榮兼內外年餘三紀受恩兩朝循涯省分實優常品

自違丹陛寒暑亟移限以大藩久絕朝覲頃以年頽疹迫
風眩日增懷闕庭而載佇仰雲霄而聳望陛下昔居春禁
臣預應朝集披膽祈恩特蒙鑒許尋奉明詔入衛鉤陳惠
澤曲流其來自遠誓生沈族未識所酬今以衰疾之年久
違趨拜望充計吏一奉宸闈頃者希天聽卑期照心靈振
蕩冰谷非危干黷旒纁伏知待罪謹言

爲李祕書上祖集表

臣某言臣聞漢朝中葉陳農求訪於圖書魏厯初基袁渙
請收於篇籍遂使容臺增飾冊府載輝雅道照於前古風

流被於末裔伏惟陛下睿德緯天神功光表截海班朔益
地延圖垂衣視典探羣玉之幽蹟虛已緣情動兼金之歌
詠由是芸香祕室青簡具陳璧水上庠漆書咸集臣大父
隋荊州刺史元操筮仕登朝官成三代學綜書部思洽詞
源雖歲序寂寥微塵無弭河東薛道衡人推才傑范陽盧
思道時號文宗並叶契相忘齊聲比價競炫梁車之寶爭
擣鄴騎之珍而二家文集久蒙宸照獨於臣門未汙天燭
貽厥之訓在臣宜守獻書之典有國通規今繕寫已訖合
若干卷謹詣闕奉進

對求賢策

問棘津登輔不因階於尺木莘郊作相豈憑資於累遷蓋
道有攸存時無可廢爰暨澆訛必修班序先容乃器因地
拔萃共相沿襲遂成標準今聖上務切懸旌心搖啟繇雖
衣冠華裔已喬遷於周列而衡泌幽人罕遙集於魏鼎豈
英靈不孕於山澤將物理自係於古今無蔽爾辭切陳其
致

對鳳德方亨必資英輔龍光未聘實俟明君既藏器以須
時亦虛襟而待物莫不理符靈應道叶冥通類霜降而鐘

鳴同雲蒸而礎潤祕策赴之如投水神心應之若轉規用
能感會一時抑揚千古是以沈鱗暫躍遂游泳於天漢墜
羽纔遷乃騰驤於日陸宏心體之妙旨播舟水之嘉謨義
列丹青德融金璧迨乎時鍾季叔化漸澆訛拔萃之惠罕
流因地之階愈篤使西都金子奕葉稱榮東國袁生八公
爲貴廷尉之明窮識理十載無知黃門之妙極摘文八遷
寧進徒使干星秀氣永翳窮塵照廡奇光長湮幽石自可
循風市馬襲軌畫龍三反不虧七年無廢戔戔束帛指邱
園而畢陳翹翹車乘望林泉而載轄則材標海若霧集丹

墀德表星精雲飛紫闕豈直高尚之士遙集於台司衡泌之儔喬遷於鼎識謹對

對用刑寬猛策

問獄市之寄自昔爲難寬猛之宜當今不易緩則物情恣其詐急則姦人無所容曹相國所以殷勤路廷尉於焉太息韋弦折衷歷代未聞輕重淺深佇永嘉議

對攘袂九流披懷萬古覽七書之奧義觀金簡之遺文覩皇王臨御之迹詳政術樞機之旨莫不則乾綱而張禮樂法霆震而置威刑縱使軒去鼎湖非無涿鹿之戮舜辭雷

澤遂有崇山之誅自皋繇不嗣忿生長往甫侯設法徒有
說於輕重子產鑄書竟無救於衰敗是知風淳俗厚草艾
而可懲主僻時昏黥鑿而猶犯我君出震繼天承國宰化
孕十堯而遐舉吞九舜而上征猶以爲周書三典旣疏遠
而難從漢律九章已偏雜而無準方當採韋弦於往古施
折衷於當今若能詔彼刑章定金科之取捨徵其張趙平
丹書之去留必使楚國受金不爲莊生所責長陵盜土必
用張子之言謹對

馬周

周字賓王博州茌平人武德中補州助教太宗朝累官至中書侍郎兼太子右庶子遷中書令以本官攝吏部尚書貞觀二十二年卒年四十八贈幽州都督高宗立追贈右僕射高唐縣公

上太宗疏

微臣每讀經史見前賢忠孝之事臣雖小人竊希大道未嘗不廢卷長想思履其跡臣以不天早失父母犬馬之養已無所施顧來事之可爲者唯忠義而已是以徒步二千里而自歸於陛下陛下不以臣愚瞽過垂齒錄竊自顧瞻

無階答謝輒以微軀丹款惟陛下所擇臣伏見大安宮在
宮城之西其牆宇門闕之制方之紫極尚爲卑小臣伏以
東宮皇太子之宅猶處城中大安乃至尊所居反在城外
雖太上皇遊心道素志在清儉陛下重違慈旨愛惜人力
而蕃夷朝見及四方觀聽有不足者臣願營築雉堞修起
門觀務從高顯以稱萬國之望則大孝昭乎天下矣臣又
伏見明勅以二月二日幸九成宮臣竊惟太上皇春秋已
高陛下宜朝夕視膳而晨昏起居今所幸宮去京三百餘
里鑾輿動輒嚴蹕經旬日非可以旦暮至也儻太上皇情

或思感而欲卽見陛下者將何以赴之且車駕今行本爲避暑然則太上皇尚留熱所而陛下自逐涼處溫清之道臣竊未安然勅書旣出業已成就願示速反之期以開眾惑臣又見詔書令宗室功臣悉就蕃國貽厥子孫嗣守其政非有大故無或黜免臣竊惟陛下封植之者誠愛之重之欲其繼嗣承守而與國無疆也臣以爲必如詔旨者陛下宜思所以安存之富貴之何必使代官也何則以堯舜之父猶有朱均之子儻在孩童嗣職萬一驕愚則兆庶被其殃而家國蒙其患正欲絕之也則子文之治猶在正欲

存之也則樂厲之惡已彰與其毒害於見存之百姓則寧使割恩於已亡之一臣明矣然則向所謂愛之者乃適所以傷之也臣謂宜賦以茅土疇其戶邑必有才行隨器方授則雖其翰翮非強亦可以獲免尤累昔漢光武不任功臣以吏事所以終全其代者良得其術也願陛下深思其宜使得奉大恩而子孫終其福祿也臣又聞聖人之化天下莫不以孝爲本故曰孝莫大於嚴父嚴父莫大於配天又曰國之大事在祀與戎孔子亦云吾不與祭如不祭是聖人之重祭祀也如此伏惟陛下踐祚以來宗廟之享未

曾親事伏緣聖情獨以鑾輿一出勞費必多所以忍其孝思以便百姓遂使一代之史不書皇帝入廟之事將何以貽厥孫謨垂則來葉臣知大孝誠不在俎豆之間然則聖人之訓人固有屈已以從時特願聖恩顧省愚款臣又聞致化之道在於求賢審官爲政之基必自揚清激濁故孔子曰惟名與器不可以假人是言慎舉之爲重也臣伏見王長通白明達本自樂工輿阜雜類韋槃提斛斯正則更無他材獨解調馬縱使術踰儕輩能有可取止賜金帛以富其家豈宜列預士流超受高爵遂使朝會之位萬國來

庭騶子倡人鳴玉曳組與夫朝賢君子比肩而立同坐而食臣竊恥之然成命既往縱不可追謂宜不使在朝班預於仕伍也

陳時政疏

臣歷觀前代自夏殷周及漢氏之有天下傳祚相繼多者八百餘年少者猶四五百年皆爲積德累業恩結於人心豈無僻王賴前哲以免爾自魏晉以還降及周隋多者不過五六十年少者纔二三十年而亡良由創業之君不務廣恩化當時僅能自守後無遺德可思故傳嗣之主政教

少衰一夫大呼而天下土崩矣今陛下雖以大功定天下而積德日淺固當思隆禹湯文武之道廣施德化使恩有餘地爲子孫立萬代之基豈欲但令政教無失以持當年而已且自古明王聖主雖因人設教寬猛隨時而大要惟以節儉於身恩加於人二者是務故其下愛之如父母仰之如日月敬之如神明畏之如雷霆此其所以卜祚遐長而禍亂不作也今百姓承喪亂之後比於隋時纔十分之一而供官徭役道路相繼兄去弟還首尾不絕遠者往來五六千里春秋冬夏畧無休時陛下雖每有恩詔令其減

省而有司作既不廢自然須人徒行文書役之如故臣每
訪問四五年來百姓頗有嗟怨之言以爲陛下不存養之
昔唐堯茅茨土階夏禹惡衣菲食如此之事臣知不可復
行於今漢文帝惜百金之費輟露臺之役集上書囊以爲
殿帷所幸慎夫人衣不曳地至景帝以錦繡纂組妨害女
工特詔除之所以百姓安樂後至孝武帝雖窮奢極侈而
承文景遺德故人心不動向使高祖之後卽有武帝天下
必不能全此於時代差近事迹可見今京師及益州諸處
營造供奉器物并諸王妃公主服飾議者皆不以爲儉臣

聞昧旦丕顯後世猶怠作法於理其弊猶亂陛下少處人間知百姓辛苦前代成敗目所親見尚猶如此而况皇太子生長深宮不更外事卽萬歲之後固聖慮所當憂也臣竊尋往代以來成敗之事但有黎庶怨叛聚爲盜賊其國無不卽滅人主雖欲改悔未有重能安全者凡修政教當修之於可修之時若事變一起而後悔之則無益也故人主每見前代之亡則知其政教之所由喪而皆不知其身之有失是以殷紂笑夏桀之亡而幽厲亦笑殷紂之滅隋煬帝大業之初又笑齊魏之失國今之視煬帝亦猶煬帝

之視齊魏也故京房謂漢元帝云臣恐後之視今亦猶今
之視古此言不可不誠也往者貞觀之初率土荒儉一匹
絹纔得一斗米而天下帖然百姓知陛下甚憂憐之故人
人自安曾無謗讟自五六年來頻歲豐稔一匹絹得粟十
餘石而百姓皆以陛下不憂憐之咸有怨言又今所營爲
者頗多不急之務故也自古以來國之興亡不由積聚多
少唯在百姓苦樂且以近事驗之隋家貯洛口倉而李密
因之東都積布帛而王世充據之西京府庫亦爲國家之
用至今未盡向使洛口東都無粟帛則世充李密未必能

聚大眾但貯積者固是有國之常事要當人有餘力而後收之若人勞而強斂之更以資寇積之無益也然儉以息人貞觀之初陛下已躬爲之故今行之不難也爲之一日則天下知之式歌且舞矣若人旣勞矣而用之不息倘中國被水旱之災邊方有風塵之警狂狡因之以竊發則有不可測之事非徒聖躬旰食晏寢而已古語云動人以行不以言應天以實不以文以陛下之明誠欲勵精爲政不煩遠采上古之術但及貞觀之初則天下幸甚昔賈誼謂漢文帝云可慟哭及長太息者言當韓信王楚彭越王梁

英布王淮南之時使文帝卽天子位必不能安又言賴諸王年少傅相制之長大之後必生禍亂厯代以來皆以誼言爲是臣竊觀今諸將功臣陛下所與定天下者皆仰稟成規備鷹犬之用無威略振主如韓彭之徒難駕馭者而諸王年並幼少縱其長大當陛下之日必無他心然卽萬代之後不可不慮自漢晉以來亂天下者何嘗不是諸王皆爲樹置失宜不預爲節制以至於滅亡人主豈不知其然但溺於私愛故使前車旣覆而後車不改轍也今天下百姓極少諸王甚多寵遇之恩有過厚者臣之愚慮不唯

慮其恃恩驕矜也昔魏武帝寵樹陳思王及文帝卽位防
守禁閉有同獄囚以先帝加恩太多故嗣主疑而畏之也
此則武帝寵陳思適所以苦之也且帝子何患不富貴身
食大國封戶不少好衣美食衣食之外更何所須而每年
別加優賜曾無紀極俚語曰貧不學儉富不學奢言自然
也今陛下以大聖創業豈惟處置見在子弟而已當須制
長久之法使萬世遵行之

請勸賞疏

臣竊見流內九品已上令有等第而自比年入多者不過

中上未有得上下以上考者臣謂令設九等正考當今之
官必不施之於異代也縱朝廷實無好人猶應於見任之
內比較其尤善者以爲上第豈容朝廷之士遂無堪上下
之考者朝廷獨知貶一惡人可以懲惡不知褒一善人足
以勸善臣謂宜每年選天下政術尤最者一二人爲上上
其次爲上中次爲中上其次爲上下則中人以上可以自
勸

諫公主晝婚疏

臣聞朝謁以朝思相見也講習以晝思相成也燕飲以晷

思相歡也婚合以夜思相親也是以上下有威内外有規
動息有時吉凶有儀先王之教不可黷也今陛下欲謀其
始而亂其紀不可爲也夫卜筮者所以定猶豫決嫌疑若
黷禮慢經先王所不用也

請簡擇縣令疏

理天下者以人爲本欲令百姓安樂惟在刺史縣令縣令
旣衆不可皆賢若每州得良刺史則合境蘇息天下刺史
悉稱聖意則陛下可端拱巖廊之上百姓不慮不安自古
郡守縣令皆妙選賢德欲有遷擢爲將相必先試以臨人

或從二千石入爲丞相及司徒太尉者今朝廷獨重內官
縣令刺史頗輕其選刺史多是武夫勲人或京官不稱職
方始外出而折衝果毅之內身材强者先入爲中郎將其
次始補州任邊遠之處用人更輕其材堪宰蒞以德行見
稱擢者十不能一所以百姓未安殆由於此

欽定全唐文卷一百五十六目錄

新文藝出版社藏書

謝偃

述聖賦

惟皇誠德賦

并序

觀舞賦

聽歌賦

明河賦

高松賦

影賦

塵賦

并序

玉牒真記

正名論

愚夫哲婦論

可汗山銘

賓靜

論顏利部眾不便處南河封事

盧士牟

段干木廟記

張神安

唐貞觀銅鐘銘

并序

張行成

諫太宗書

請太子監國疏

高若思

勸封禪表

楊師道

聽歌管賦

欽定全唐文

卷百五十六

目錄

三

李君政

宣霧山鐫經像碑

欽定全唐文卷一百五十六

謝偃

偃衛州衛人本姓直勒氏貞觀初應詔對策高第歷高陵主簿十一年穀洛溢詔求直言偃上封事擢宏文館直學士拜魏王府功曹府廢出爲湘潭令

述聖賦

臣聞立極著紀之初闢乾開歷之始上所以分垂象曜下所以疆括地里惟大人之有作越百代而孤峙飛五位以龍奮騰九萬而鵬起曩者災運將終鼎命云絕四溟波駭

八維幅裂羽檄交馳邊烽並熨長星夜掃陣雲朝結莫不
望壁壘以靡旗對轅門而亂轍故得百城冰潰千里煙滅
固靈命之有在乃慷慨而投袂驅八駿以雷擊馭六飛而
電逝騰星劍以外倚振雲鋒而高彗旣後事而先謀亦先
勝而後制兵有臨而必剋功無往而不濟龜策叶以符兆
人神應而合契諒包項以駕軒實孕皇而育帝足以光燭
千祀足以祚隆萬世於是戢兵偃武銘功紀勩採三代之
逸經刊八方之遺籍搜隱遁於林藪訪棲遲於巖石然後
調玉律以定時測金儀而考厯符洛下之前驗嗣容成之

絕迹若夫流惠澤於瀛表被仁風於區外窮八際以來庭
踰九譯而浹會莫不削衽而崇禮樂解辮而襲冠帶參兩
曜以齊明混二儀以稱大信一人之致感實萬方之攸賴
聖皇以令叶先甲時惟仲春乃整法駕馭華輪六軍雷動
萬乘星陳臨濁河以北睠指清洛而東巡乃升雲闕俯天
津朝萬國禮百神琛賫咸集要荒畢臻夫其地也據三川
以設險憑四闕而作固總奔湊於八方測圭影於中度旣
定鼎於周業亦克昌於漢祚望嵩巒之邈迤臨峻坂之迴
互所以仰叶辰象所以俯清天步若夫削靈巖以表闕疏

清派而爲池極皇居之壯麗窮大廈之宏規抗修廊之窈
窕屬輦道而逶迤夕霞臨而錯落晨光照而陸離至如雲
觀晨開風亭夜敞迴長飈於輕翼凝濃露於仙掌沈落月
於璧臺挂奔星於珠網羅紈飄而散馥環珮動而流響垂
密葉於綺窗散飛花於翠幌復有天池濛汜以嬉以遊鼓
輕桡漾仙舟蔭喬木鏡清流魚鳥陵亂蘋藻沈浮控飛梁
以架迴列層閣以環洲漬檀欒之修竹映迢遞之危樓風
未生而葉動景將昃而光收若夫瑞草奇色祥樹嘉名霏
紅曜紫垂緗拖青或玲瓏於玉砌或點綴於金楹交九衢

而結影分四照以開榮浥朝露而逾馥帶晨風而更輕於
是登崇觀以周覽闢層軒而遐矚樹含嶺而共青草帶原
而同綠俯八紘而非遠顧千里而爲局飛霞斂而復舒輕
烟斷而還續旣神怡以情暢乃遣累而思足聆天籟之晨
響想鳳簫之夜聲窺藂雲之朝散思鶴蓋之後清捐大位
而不寶脫萬乘而爲輕訪真人於姑射問至理於廣成志
眇眇以遐顧心遙遙而上征踐太微之崇閣闢閭闔之天
扃拖紅旗於絳闕翼芝蓋於紫庭咀靈一作氣而還壽吸
元液以駐齡若夫北瞰太行南臨少室積峯遠而逾翠重

巖隱而復出乍鬱律以干霄又岿嶷而槃日松翳空而難
辨鳥翔高而易失屬天下之無事聊逍遙以自逸方欲登
日觀以撻金覽云亭而竚蹕於是凝聖情以遠慮思成敗
於終古美揖讓於有虞壯成功於大禹恥用兵於中冀鄙
窮戰於丹浦每有違於汝弼恒知失而思補乃命促苑囿
散積聚改制度易規矩削侈麗於樓臺崇質素於階宇仁
好生而必遂德無貫而不輔習嘉禮於玉帛和大樂於鐘
鼓上可以降集羣瑞下可以安懷率土惟聖作之可觀實
萬物而斯覩顧微臣之庸朽濫叨選於詞林恒戒盈以獻

賦每規過而進箴幸天地之覆載欣日月之照臨豈窺入
而識象寧測海而知深徒望雲以考澤空就日而傾心漸
九皋而戢翰望天路以揚音美皇運之方永嗟頽齡之遽
侵顧鴻恩之未答徒頌德以長吟

惟皇誠德賦

并序

臣聞理忘亂安忘危逸忘勞得忘失此四者莫不皆然是
以夏桀以瑤臺瓊室爲麗而不悟鳴條南巢之禍殷辛以
象箸玉杯爲華而不知牧野白旗之敗故當其盛也謂四
海爲已力及其衰焉乃匹夫之不制當其信也謂天下爲

一心及其疑焉則顧盼皆爲讎敵是知必有其德則誠結
戎夷化行荒裔苟失其度則變生骨肉釁起腹心矣是以
爲人主者不可忘初處殿堂則思前主之所以失朝萬國
則思今已之所以貴巡府庫則思今日之所以得視功臣
則思其爲已之始見名將則思其用力之初苟弗忘舊則
人無易心則何患乎天下之不化故朝行之則爲堯舜暮
失之則爲桀紂豈異人哉其辭曰

周墳籍以遐觀總宇宙而一窺結繩往而莫紀書契來而
可知惟皇王之迭代信步驟之恒規莫不慮失者常得懷

安者必危是以戰戰慄慄日慎一日守勤守儉去奢去逸

外無荒禽內無荒色唯賢是授唯人斯恤則四王不足五

六帝不足七

一作三皇不足六五帝不足十

若夫恃聖驕力狠戾倔彊忠

良是棄諂佞斯獎構崇臺以造天穿深池以絕壤厚賦重

斂積寶藏鎡無罪加刑有功不賞則夏桀可二殷辛易兩

在危所恃居勿忘想功臣無逐故人無放放故者亾逐功

者喪四海岌岌九土漫漫覆之甚易存之實難是以一人

有悅萬國同歡一人失所兆庶俱殘喜則嚴寒爲熱怒則

盛夏成寒一動而八方亂一言而天下安舉君過者爲忠

述主美者爲佞苟承顏以順旨必蔽視而掩聽動雖非而
謂神言縱失而稱聖故曲者亂直邪者醜正改華服以就
紫變雅音而入鄭雖往古之軌躅亦當今之龜鏡崔巍龍
殿赫奕鳳門包四海以稱主冠天下而獨尊旣兄日而姊
月亦父乾而母坤視則金翠溢目聽則絲竹盈耳信賞罰
之在躬實榮辱之由已謂羲皇而易匹言堯舜之可擬驕
志自此而生侈心因茲而起常懼顛而懼覆必思足而思
止勿忘潛龍之初常懷布衣之始在位稱寶居器曰神鼓
鐘庭設玉帛階陳得必有兆失必有因一替一立或周或

秦既承前代當思後人唯德可以久天道無常親

觀舞賦

惟欽明之昌運應靈圖而嗣籙紐三代之離術正千齡之
差朔可以治定制禮可以功成變樂實磐石之攸寄固維
城之斯屬欣微生之多幸濫高選於名藩列通籍之渥惠
承置醴之殊恩晨曳裾於東閣夕侍宴於西園於時霜氣
斂靄夜景澄廓雲撤層臺煙銷連閣流月華以昭耀間星
文而灼爍巖桂偃而未彫宮梧紛而就落於是羅薦周設
黼帳高舒露凝珠網風清玉除烟浮輝於緹幕燭籠光於

綺疏爾乃咀清哇揚激徵金石奏絲桐理奇調間發新聲
互起促宴冶而忘疲歡情暢而未已於是燕餘齊列絳樹
分行曳綃裾兮拖瑤珮簪羽釵兮珥明璫擢纖腰之孤立
若卷旌之未揚紆脩袂而將舉似驚鴻之欲翔退不失倫
進不踰曲流而不滯急而不促絃無差袖聲必應足香散
飛巾光流轉玉若乃巴姬並進鄭媛俱前對席齊舉分庭
共旋乍差池以燕接又颯沓而鳧連止有餘態動無遺妍
似兩艷之同發類雙花之偶然進止合度俯仰若一節緩
則顧遲唱速則迴疾殊姿異制不可殫悉若夫金翠的皪

綃綺參差方趨應矩圓步中規飛鈿雪落頽鬢雲垂舒類
飛霞曳清漢屈若垂柳縈華池旣而曲變終雅奏闋清角
止流商絕頓華履以自持整文袿而竚節始綽約而迴步
乃遷延而就列於是君王悠然懷古怡然自適遷思迴慮
弛縣改夕揖摛藻之賓引良談之客然後討覈八索詆訶
六籍語妙則衆絕希夷論遠則喻窮開闢議先哲之往軌
考前王之餘迹方欲革登封之頌勒云亭之石與日月而
齊明同天地之不易

聽歌賦

君王以政隙務閑披翫餘日闢華軒以遐想臨風庭而自
逸於是屏青編收縹帙息柔翰韜雅瑟情廓志遠慮靜神
謐於時日下梧宮陰清竹殿鮮雲始發光風初扇餘霞未
斂殘虹猶見玉笋旣陳蘭肴乃薦登龍閣而騁目臨曲池
而遊眄於是徵趙女命齊倡動瓊珮出蘭房橫寶釵而耀
首靚鉛華而飾粧低翠蛾而斂色睇橫波而流光聲欲伸
而含態氣未理而騰芳乍連延以爛熳時頓挫而抑揚始
折宮以合徵終分角而扣商掩餘韻於雕扇散輕塵於畫
梁若夫振幽蘭飛激楚俯仰豔逸顧盼容與其繁會也類

春禽振響而流變其微引也若秋蟬輕吟而曳緒似將絕而更連疑欲止而復舉短不可續長不可去延促合度舒縱有所聽之者慮蕩而憂忘聞之者意悅而情抒歌未終君王乃喟然歎曰夫樂者所以通神明節情欲和天地調風俗觀往代之遺風覽前賢之軌躅莫不治亂斯在興亡攸屬是故聖人以爲深誠君子以之自勗於是放鄭衛引鄒枚臨廣苑陟崇臺肆東平之樂包天下之才盛矣美矣優哉游哉

明河賦

月初迴於夕陽日夜沒於天綱步庭砌以游衍覺雲霄之
杳茫氣象萬殊緬星河而盡列光輝一道羅銀漢之靈長
徒觀其粲兮如磋潔兮如磨明月照而不失其素飄風驚
而匪揚其波莫測其深含天際之四氣莫度其遠掩人間
之衆河及夫歲入三秋勢直千里度龍駕而容曳構鵲橋
而迤邐霞妝星靨知婺女之不如雜珮明璫必姮娥之相
似七夕作之以良會羣方於是而仰止固能流不可準涯
不可度旣莫見乎端倪亦焉知其厚薄夫其爲謙也太陽
曜而不爭其光夫其爲德也巨海枯而莫之能涸奪凝霜

之漫漫方白石之鑿鑿居崇高而不危體虛無而自若名
連地脉影雜天文當齊夕而逾曉凝微雨以暫曛明白可
稱則皓如曳練正平可緝亦矗似長雲亘紫極以斜轉橫
碧空而中分吐霄光而澹灩含曙色而氤氲將欲問之於
槎客如何欲決於嚴君

高松賦

登靈岳以遊目極千里兮周睇盡山川之重沓容雲物之
詭怪何茲松之挺茂擢脩幹於孤林映丹霄而有葉淩青
霞而矯心前絕萬仞却倚千尋俯崢嶸之深谷仰迢遞之

層岑霏夕煙而暖景度神飈而流音若乃月起陽爻歲窮
陰律匝地冰厚周空霧密雪積巖而逾峻風乘林而轉疾
結晻霏之愁雲黯蒼茫之寒日於是眾草零羣木墜千巖
槁萬嶺悴獨潔固而不渝常猗猗而結翠始見貞而表潔
乃以叢而辨類夫其深山遂性委液流津感天地之粹質
稟陰陽之精純根含冰而彌固枝負雪而更新旣無懼於
元月寧有悅乎芳春含奇文而養勁收高節而自珍恥取
媿於嵇子嗤受封於亾秦本絕希於雕刻詎有憂於斧斤
若乃流膏可咀嘉賓可薦香有四飛味逾九轉延促齡於

度隙駐生涯於流電故餌之者目改服之者容變紛羽翼
而上騰排紫虛而高扇起九垓而憇息周四海而顧盼信
神經而最品實秘錄而精選嗟美材之無用悲側路之嶮
巖動跬步而致阻投一足而必危傷拙目之衆毀慨名工
之獨知仰徑寸而靡及屈百尺而自卑縈白雲以舒蓋接
丹桂而交枝凝暉遠而澹景纖羅挂而輕颺窮萬祀而不
異厯千秋而不萎豈茲木之足歎亦前賢之所規何吾生
之命舛懷丹誠而莫披心炳朗而無報情蕩滌而不羈任
儻來之否泰委元運之遭隨戢輕翮而未舉踈逸足而莫

馳實未榮而先怠寧泛駕而致疲誠責躬而咎已豈藏瑕而掩疵恒怯進而勇退每知雄而守雌庶比茲以自勗履貞固而不虧

影賦

何物類之實繁各異形而辨色惟茲影之靈化獨元妍而莫測若乃體無定質應變隨方因物成象不拘厥常苟圭表之有度信天地之可量同寒暑之延促故夏短而冬長在清明而必朗若晦濁而斯亾同至人之隱顯類君子之行藏若夫長短侔形曲直應質細故則一毫必具大物則

萬象無失並片魚而爲比偶孤鳥而成匹帶秋林而暫疎
含春樹而還密將度雲而俱遠與奔駟而同疾至如景霽
氛收波清風止平湖數百澄江千里有象必圖無物不擬
羣木懸植叢山倒峙崖底天迴浪中霞起咸巨細其若一
各委曲而相似窺之者莫測其淺深尋之者罔知其終始
苟煙霞之可乘何神丹之足鍊流金液以命酌指玉京而
高宴含虛無以成體故日中而不見同希夷以寂寞何罔
兩之能眩若夫往來絕跡出入無間走不可避速不可捐
非可以智察難可以理詮向夜月而處後背朝日而居前

何變化之無定同瞻之而忽焉安仁覽以生悲士龍觀而

興笑孫惠顧以致悚田巴臨而獨照想古人之遺烈

一作形

哀吾生之不劭守愚直以固窮無明畧以求効歲月忽其
代序斑鬢倏而改貌誠既往而莫追徒鑒流以自弔若夫
色動秋水光澄鍊金翠羽朝映珠星夜臨近看若淺遠矚
如深信不入而疑入實非沈而似沈旣寄形於流豔又匿
跡於凝陰類聖人之無已以萬物而爲心福應善而斯臻
禍緣愆而必至念全德以守一思改過而無二寧受屈以
懷道不求伸以邀利庶履危以自勗終餘年而不墜苟刑

網之所加雖在親而無肆誠言行之可錄縱居嫌而勿棄
必取舍而無私故捫心而不愧獨水鏡之鑑物窮妍媸而
莫祕誠斯道之可寶請貽戒乎在位

塵賦

并序 應
魏王教

余執性介直動多違忤茲讀老子至和光同塵竊有慕焉
因而賦之

伊大噫之煽物氣無擊而不揚惟茲塵之宜昧何動息之
順常若乃寄形大颺託質厚地倏爾而往忽焉而至乍徘徊
以上騰或飄颻而下墜起彼集此不失厥位居無不安

涉無不利似達人之推理任逍遙以自肆若夫陰風發陣
雲屯鼉鼓震紅旗翻千乘動萬騎奔中原以之黯色白日
爲之晝昏其興也勃其息也漸或聚或散乍舒乍斂細不
可捨輕不可掩蒙籠篋笥羃屨茵簟隨時無競應物不違
值細雨而暫息逢輕風而復飛霍霍靡靡雰雰霏霏將晨
軒而並出與暮蓋而同歸任動靜而無累似識變而知機
若夫拂珠履生羅襪積菱鏡而鸞沈下雕梁而歌發散瓊
臺而類粉布玉階而似雪蒙鳳輦於銅衢翳龍媒於金埒
有動必隨一作發無空不遍出入青瑣遊揚紫殿流細影於

迴裾亂浮香於舉扇隱洞房而難覩因隙光而可見既洋溢若浮煙又散漫如流霰至如化衣京洛鍊石仙家色伴雨壤影若飄沙逐奔蹄而起亂隨驚輪而飛斜近則昏阡蔽陌遠則晦景韜霞疑竊食於顏子先甘餌於元蛇惟紛吾之孤介驟萍流而蓬徙旣守愚以周直每受訕而招毀屢空范丹之甌時卧李恂之被未齊物於莊生庶同塵於老氏

玉牒真記

粵一氣未分之前二儀肇闢之始綿哉邈矣固無得而稱

焉泊乎立極斷鼇補天煉石三光抱石之帝九色乘雲之
皇龜文發而八封成鳥跡命而六體備於是書契著焉文
籍興焉是以褒貶定於一言美惡在乎千里或揖讓以崇
文德或干戈而擅武功雖五運代昌三正更襲質文殊軌
馳驟異規莫不詳諸典策可備而言矣爰自近代迄乎周
秦兵革迭興英雄互起假名竊號者三分有二千紀亂常
者十居其九是以八維幅裂四海瓜分玉壘稱王金陵謀
帝重以中原塗炭戎羯憑陵衣冠禮樂掃地將盡數百年
間未聞正朔我聖王之受命也則九服翹心三靈竚睞振

乾維以綴象舉地絡以籠人曩者炎運將終九域淪陷於
是披丹霄而軒鵬翼駕元海而截鯨鱗俯拔嵩華仰迴星
漢納風雲於懷抱鼓雷電於胸臆流雕矢於日谷橫大劍
於天外所以八秋乘風九夷請朔固可以包鎮虞夏跨躡
殷周於是體天制作順時立極進力牧於沮澤求風后於
海隅所以三傑並臻十亂咸集故能佐命垂統飾化開業
也所以神功茂績通幽洞冥反無爲於上皇復淳朴於太
素是以歌五英則八風順奏六德則百獸舞至於素毳丹
羽極飛走之祥頽萼華叢窮草木之瑞天無所秘地無所

隱圖史所莫紀篆牒所未詳莫不昭晰相暉紛紛交映充
庭滿園盈郊洽野豈止二氣運而景星出三文著而神鳳
儀而已哉於皇上帝於始月首日乃負斧戣御華軒駐金
根陳玉輦千門旣啟萬國咸萃金石備列琛贐畢陳於是
九司三事羣公百辟相與端紱理纓趨而進曰臣聞惟天
爲大聖人所以取則謂地蓋厚皇王所以受圖是知仰觀
俯察明靈斯在上戴下履福應攸歸莫不順之者獲昌違
之者致咎臣逖聽邃古遐觀往牒睿君哲主無易茲道雖
復七十二代書契莫可至於登介邱基厚地建顯號施尊

名展禮告成其義一也此乃百王之壯觀萬古之丕業昔
齊桓以三代之功處諸侯之位尚睥睨梁甫睠顧太山况
乎扼四海吞萬國寵九域括八荒如何湮沒而無聞哉夫
登封者所以易姓奉繼興絕崇功不可闕也是可闕也則
神可誣而天可欺矣今陛下乃欲貶惡百靈拒絕羣議虧
厥真紀昧茲懿德使泰山指望梁甫失幸金繩脫檢玉牒
收文瑞日潛暉德星晦色此非所以發榮舒德應天順時
垂裕百代激流千祀者也臣等盡慮悉心不敢奉詔胸計
腹議切欲獻忠往者九章淪次五緯失方遂令歸餘爽終

履端乖始陛下既考之以玉律又則之以金儀定于載之
差辰正百王之廢朔符落下之明驗復容成之妙旨此又
聖德之盛也伏願陛下上祇天庥下順坤德叶羣神之望
從億兆之心清蹕云亭鳴鑾岱岳肆射牛之禮展大澤之
詩垂紺幄而佇羣神謁紫壇而陳眾瑞使白雲朝起靈光
夜燭應千齡之期流萬歲之響則四溟受福天下稱泰臣
等敢資靈贖合符瑞之至極願以固請於是乃凜然動色
曰過乎何辭之飾也朕聞惟德弗逮罔有克惟言弗審罔
有徵觀乎周漢之苟進良足惡矣縱天命有在予將崇讓

焉於是稽紳之徒俯而謝仰而頌德曰

明明聖範巍巍至德元化難名神功靡測上包乾象下括
坤域五岳塵消四溟波息仁風綿浹惠澤下霈船海極琛
梯山窮貝九譯同德萬里齊信宿彗收芒朝雲解陳階冀
晦落庭軼晨鮮氤氲和氣蕭索非煙輪重壁合星次珠聯
鴻名始茂景祚方延霧闢雲岸霞褰日觀山川致祇人神
叶贊靈貺凝祥光華啟旦播美貞石馳芳柔翰德盈彌損
道積逾冲禮成思大樂變推功讓爲政始益寡謙終千齡
展美萬古承風

正名論

有宏文先生稟氣沖和資靈傑秀理在微而必察言無蹟而不探加以體局凝沈風骨峻遠縱班馬而高出嗣顏冉而委蛇於時日暖朱墀風清紫陌長廊赫奕高閣陰岑先生方該祕紀於千載釋疑滯於萬古於是席長筵列髦俊散縹帙布青編簪纓畢萃綺紉咸集乃有以司鎡丈人戎服而至蓬首垢面頰削背偃左挈戟右提鞬類汗蒙塵不讓而坐先生逆而目之顧而誚曰夫杖者位之基器者名之實苟有叨竊咎悔必臻當今天下文明會昌御運舉宇

宙以籠物馳日月而燭幽居概盈朝鵷鷺成列是以鳴玉
曜輝者恥方於周召披堅執銳者羞比於韓彭至於採擇
人倫摭摭要言有美斯達在器無假文武異容正位辨方
朱紫無雜任能授用咸得其所是以山無逋客野絕遺賢
方欲闡文儒銷鋒刃陳俎豆散牛馬肆志於禮場遊心乎
文囿大啟石渠之署廣開天祿之門搜寰內之琳球擢天
下之杞梓旅之於東觀會之於北閣考往聖之遺逸正先
賢之紕紊欲令微言隱而更顯至德晦而復明然後草封
岱之儀備射牛之皮今子齒既盡矣形又槁焉上不敢貢

策獻奇析珪分祿下不能收視反聽養真存神以螢燭之
末光而方增耀於日月涓滴之微潤而欲擬浸於江湖其
於餘生固亦勞矣猶不免佩弦荷箠坐甲操鋒見長劍而
折腰對危冠而屏氣以茲疲朽預此戎班點污我文門虧
辱我宰塾顧瞻傳素能不慙乎丈人於是俯而慙仰而謝
逡巡避席斂衽而對曰僕聞用舍時也窮達命也物固有
欲而不可棄此蓋有力者走之豈在吾之所筭也且夫苟
非其用則周孔無以措其心當其所能則犬馬猶足効其
力今請正名改服從子而遊可乎先生曰噫子其不言幾

失子矣苟能易位余何簡焉

愚夫哲婦論

昔有愚夫者家本大賈積資巨萬旣生豪門長乃潤屋所以衣必極麗食必窮珍而稟性頑魯不閑貨殖旣而父終兄喪生計歸之每有貨易動多遺利其妻敏而有識常思歎曰若此子家貧無日矣夫常市珠及玉所費萬計唯獲燕石魚目而還妻覩而誚之曰此非真也何失鑒其若是乎於是愚夫乃作色虬鬚攘袂瞋目顧而呵其妻曰吾訪肆人皆云美玉也問諸闈吏咸云美珠也吾固先訪而後

市先問而後買豈吾不擇而擅取哉其妻怒而復曰夫玉石異體珠目殊狀雖色類相似而明潤懸絕但子愚昧未詳耳若使人言是而隨是之人言非而隨非之此卽取捨在彼子何預焉故有離珠之目者不可惑之以色有師曠之耳者不可惑之以音今若問人而後識者此乃聾瞽之事也豈有耳目者所爲哉於是夫妻怨競累日不息時隣家有寓居遊士聞而歎曰誠哉哲婦之言可謂信而有徵

可汗山銘

維貞觀十三年歲在己亥二月甲戌朔八日辛巳聖唐大

使右武衛大將軍慕容寶節度副使朝散大夫任雅相等
肅奉明詔冊授大單于真珠毗伽可汗嫡嗣爲肆葉護可
汗安懷率土廓裁宇外曩者隋厯旣終九域淪覆天資聖
明光啟有唐而頡利背恩虐我邊域是以輕賫電發直掩
虜庭驅縱驍雄奔放忠烈百弩俱發萬鋒齊舉鞭雷鼓霓
動天維於上拔山蹴岳移地軸於下雲騎騰盪則川野晝
昏風旗揚曳則辰離黯色擒谷蠡於谷口曾未崇朝斬日
逐於轅門景不移晷龍庭柳塞之外煙滅雲銷瀚海天山
之前波澄霧卷上以震皇威於萬葉下以安億兆於千齡

雖有靈祇贊我有唐亦所以恢崇今單于地

一作也

是以萬

里齊契四海同規始驗秦防徒營漢城虛築在德非險皇
哉唐哉勒石紀功騰聲不朽詞曰

振天威兮橫朔方星劍騰兮虹旗揚窮絕漢兮越幽荒拜
單于兮冊名王厯千載兮聲彌光

竇靜

靜字元休贈司空抗子武德初累轉并州大總管府長史
檢校并州大總管太宗朝授司農卿封信都縣男改夏州
都督再遷民部尚書卒諡曰肅

論頡利部眾不便處南河封事

臣聞夷狄者同夫禽獸窮則搏噬羣則聚麀不可以刑法
繩不可以仁義教衣食仰給不務耕桑徒損有爲之耻以
資無知之虜得之則無益於化失之則無損於時然彼首
邱之情未易忘也誠恐一旦變生犯我王畧愚臣之所深
慮如臣計者莫若因其敗亡之後加其無妄之福假以賢
王之號妻以宗室之女分其土地析其部落使其權弱勢
分易爲羈制自可永保邊塞代爲藩臣此實長轡遠御之
道

盧士牟

士牟貞觀初官河南府伊陽縣主簿

段干木廟記

陝之芮東有祠署於道曰魏文侯師段干木廟謹按史傳
語文侯過其廬必式呂覽云秦攻芮司馬康以先生深諫
其君又按圖經云先生以原上草廬中高枕而卧秦遂解
兵昔子貢救魯挾辯詐扶危主然後僅而獲免豈若先生
靡勞師徒曠然晏息而國不加害民受其賜誠以德充氣
融道義純備者矣貞觀元年秋八月七日將仕郎前守河

南府伊陽縣主簿范陽盧士牟載想遐踪願誌遺廟

銘曰鼎河在南中條在北洪河橫流以紀魏國天地淑靈
山澤粹精惟公克生爲魏之楨鄰不加兵民用舒寧秦號
虎狼役厲重傷毒螫斷斷侵軼西強瞻我仁人沛然知方
以義以暴以柔以剛善師不陣古稱至德先生晏然婆娑
偃息蓬居草廬是敬是式比彼干戈俄成禮則士之生世
人爵爲貴功成不居惟德之懿士之避土或蹈遐裔公則
靖民以義爲利我行其野祠宇巋然播詠仁風精誠若傳
條山如礪河水如帶先生之德永永不昧

張神安

神安貞觀中上大將軍

唐貞觀銅鐘銘

并序

蓋如如實際性相平等念念虛假緣業萬殊是以導之以
解脫禮樂未之汨誨之以究竟象繫所不言鄜州寶室寺
上座羅漢等漏茲獨善府宏六度不捨羣生服膺四攝以
大唐貞觀三年攝提在歲蕤賓御律景丁統日己巳司辰
用銅三千斤鑄鐘一口法天地以爲鑪假飛廉而扇炭尅
飾牟造化巧麗若神工感蜀山而自響擬漢厝而遠聞挺

弗能發理切舍宏扣而斯應義均虛受聿警四部式遵六
昧未假于箭漏靡資於雞鶴懺誦顧而有節精進因而無
怠方諸几杖小大之用旣殊譬以盤盂洪纖之理多裕輒
緣斯義乃爲銘曰

眇眇三界悠悠四生愛染有著沈沒無明法輪覺夢慧炬
照冥大空固得微妙焉名無爲不住有爲不盡去彼常樂
來深慈愍然頭拯救靡足汲引且戒且禪或檀或忍爰造
洪鐘晨昏取則和會攸仰禮懺無忒並航欲海俱遊西國
開物成務是鐫是勒

張行成

行成字德立定州義豐人隋大業末察孝廉爲謁者臺散從員外郎後爲王世充度支尚書世充平以隋資補宋州穀熟尉應制舉乙科授雍州富平縣主簿補殿中侍御史累遷侍中兼刑部尚書高宗朝封北平縣公拜左僕射太子少傅永徽四年卒贈開府儀同三司并州都督諡曰定

諫太宗書

有隋失道天下沸騰陛下撥亂反正拯生人于塗炭何周漢君臣之所能比擬陛下聖德含光規模宏遠雖文武之

烈實兼將相何用臨朝對眾與之較量以萬乘之尊與羣下爭功哉臣聞天何言哉四時行焉又聞汝惟不矜天下莫與汝爭能臣備員樞近非敢知獻替之事輒陳狂直伏待菹醢

請太子監國疏

伏承皇太子從幸靈州臣愚以爲皇太子養德春宮日月未幾華夷遠邇佇聽嘉音如因以監國接對百寮決斷庶務明習政理旣爲京師重鎮且示四方盛德與其出陪私愛曷若俯從公道

高若思

若思太宗時人

勸封禪表

伏願褰旒寫照洽羣請於帝俞闡續垂矜遂微懇於人欲
騰茲璽誥激彼天波徵萬玉以警途詔八神而弭策藉江
茅而陳鄙黍飾蒼壁而奠黃琮馳萬歲以飛聲接九重而
婉美使編珠毓貺開麗色於金泥觸石凝禎蕩浮華於石
礧式昭昌祚永播鴻名凡在生靈義深聳踴

楊師道

師道字景猷宏農華陰人隋末自洛陽歸高祖授上儀同
爲備身左右尚桂陽公主累轉太常卿封安德郡公貞觀
朝遷侍中轉中書令二十一年卒贈吏部尚書并州都督
諡曰懿

聽歌管賦

爾乃闔飛閣之臨空望雕梁之架虹奏東城之妙曲命南
荆之結風莊華豔於朝日長袖曳於芳叢度參差以儀鳳
響嘹亮之驚鴻伊小臣之庸瑣預恩私之嘉宴聞仙管於
帝臺聽鈞天於蘭殿悵崦嵫之易晚惜宮羽之難遍撫長

笛而多慙覽洞簫而興怨徒隸齒於羣龍信庸音其已薦

李君政

君政貞觀七年行宋州參軍武縣尉

宣霧山鐫經像碑

高士李惠寬趙郡象城人也皋陶之後左車之允盤石之
宗連華帝籍生而達理長而悟元齟齬之年蔡伯喈聞而
趨步猗嗟之歲王平子見而絕倒洞徹若空之理偏知物
我之義爲半句而燔兩臂爲一偈而燒七指尸毗割肉嚙
椎捨身方之厲行畧無差等加以食松却粒卧石漱流夏

則編草爲衣冬則引茅自覆形體雖殘不以爲苦謗訕雖
至不以爲失猛獸去骨未足稱奇野鳥來巢詎將爲異屬
有隋失馭區宇分萌百郡則杼軸皆空千城則骸骨俱滿
龍驚鷁退豕突鯨吞叢爾漼然聲噉蕩蕩惠寬及於華巔
早遇太平不恡身形共崇福業泊粵若稽古大唐仰握天
鏡俯案地圖應期接統濡足授首據八十一萬之分承七
十五代之君類大庭華胥之時同尊盧祝融之日惠寬荷
皇穹與善素樂獲從值聖人旣作萬物咸覩以武德六年
四月八日乃於此山報國修立龕巖爲室鐫石造賢刼千

佛法華經一部營構浩大神靈護持就使百億須彌未有
若斯修福者也其南則臨柏縣龍興避地之所北帶茅山
鶴駕遊天之處東則神泉洶湧遠遶滄波西則低水漲灇
近連翠嶺彌亘千里控帶百川邈迤河南之垂徘徊冀北
之際下籠金闕上跨玉京旣達退食之墟又接還簪之境
如來真範徧滿巖崖修多妙旨週迴嶺岫長松映彤庭之
彩文石晃紫金之像因竹林而起精舍爲檜樹而製香爐
雲物浮沈恒過鹿野鳥兔來往直指鷺山窻戶平接星宮
梁棟斜通月殿旣類從天化成又若因地湧出名僧搖錫

遠邑爭來德士褰衣他方並至於是使持節上柱國本州
諸軍事定州刺史定州都督相州總管杭州刺史光祿大
夫呂國公士洛佐命心膂幹國爪牙王白廉李之流絳灌
樊滕之輩飛旌河朔疊鼓恒陽發摘旣類秋霜仁明復同
春日六條布德志洽弟兄十部垂恩情深岵岵魚懸犢在
百姓興五袴之歌鴈至鹿馴四民發兩岐之詠恭敬三寶
回向十方脫捨財帛減徹車馬遂與惠寬共營此福大宏
妙規深啟檀度伯仁縣令嚴雄撫宰百里清肅一圻迹同
遷蝗治倖馴雉精誠信向經始伽藍勸課丹青修飾經像

雖目連之神通敏給文殊之智慧莊嚴婉此尊崇實爲儔
類有宿士李長欽李士羅李希哲李明朗牛孝祖等並鄉
社髦乂里閑清修愛法念道奉善樂施惟昔微功少效尚
載景鐘細事磨言猶書甫鼎况布金重意剖骨殷心用樹
高碑期傳來業